



Jumat 20 Mei 2022

Ogen: Lukas 3:11



BEREKEN MAN SIPERLU



Perlu, la perlu, seh kal perluna. Megati lit pertimbangan si bagenda ibas geluhna guna nentunen ras mutusken sada-sada hal. Umpamana ibas ngelitken sada barang, ibas keterbatasan perduitennta, enda me sibahan jadi pertimbangan.

Ibas jaman sigenduari enda, la sitik manusia si ndalani geluhna alu erpoya-poya. Make ras ngelitkenca alu luar biasa, la erbias-bias, asakai pe kurang, kuga pa pe buena lalap la erpuas-puas. Siperdiateken uista, lalap ganti, tambah beliganna sabab mode lalap mbaru, lit saja fashion siiciptaken kalak. Lit bagin kalak mbaru, ngena ateta, minter ka siusahaken ngelitkenca. Emaka lanai bias dua lemari deba uista. Dampar sideban, lit si kurang denga siman pakenna.

Kepeken kecibal sibagenda labo jaman enda saja ngenca jadi, kepe nai nari pe enggo me lit. Enda me isi berita si ipeseh Johannes Peridiken paksa ia ndahiken dahinna, sora sierlebuch itaneh mesawang. Lukas nuratken enda lako ncidahken kuga kin situhuna pengaloken kalak simegiken kata siisehken Johannes enda. Tema berita siibaba Johannes eme 'jeralah ibas dosa-dosanndu nari'. Tandana enggo jera, nungkun kalak sinterem 'kai arus ibahan kami'? Johannes nuriken keperlun utama manusia eme uis ras pangan. Kerna baju, ise lit dua bajuna iberekenna sadaman kalak si la lit bajuna. Ertina, ula kem ngidah kalak siperlu, ula sempat ia bergehen. Kerna pangan, ise si lit nakanna ibagikenna. Ula pediat lit kalak lumben, arus sigejabkenbeltek kalak sideban melihe.

Arah kata enda, nterem kepe kalak siperlu kerna keperlun geluhna. Nakan siman pangan, uis si man paken. Kalak sitek arus ngasup ngidah keperlun kalak sideban. La terjeng meteh tapi rukur kuga carana banci nampati, mulahi ia ibas persoalenna. Mari sibuat baginta mere man kalak siperlui alu nggit mperdiateken keperlun kalak e.

☞ *Cidahken tanda kam nggo jera, erbagilah man kalak si perlu!*